

四庫全書

史部

欽定四庫全書

史部

文獻通考卷一百四十四至

詳校官編修<sub>臣</sub>李堯棟

編修<sub>臣</sub>程嘉謨覆勘

覆校官庶吉士<sub>臣</sub>陳墉

校對官主事<sub>臣</sub>龔敬身

謄錄監生<sub>臣</sub>何均

欽定四庫全書

文獻通考卷一百四十四

都陽馬端臨貴與著

樂考十七

樂舞

雲門 大卷 大司樂以樂舞教國子舞雲門大卷鄭

注黃帝樂曰雲門大卷黃帝能成名萬物以明民共財  
言其德如雲之所出民得以有族類也

陳氏樂書曰周官大司樂舞雲門以祀天神傳曰雲出天氣雨出地氣則堯之樂以雲門名之以天氣所由出入故也世之論者以黃帝之樂為咸池亦曰雲門大卷然雲門大卷取諸天咸池取諸地其可合而一之乎周官以雲門為六變之樂郭友直以十二成直言之不知奚據而云魏王朗謂自雲門至大武皆太廟舞樂名然則六樂之用衆矣豈特為太廟設哉

大咸 大司樂鄭注大咸咸池堯樂也堯能殫均刑法  
以儀民言其德無所不施

陳氏樂書曰莊周嘗謂黃帝之咸池又謂黃帝張  
咸池之樂於洞庭之野樂緯呂氏春秋前漢志白  
虎通李善亦謂黃帝作咸池則咸池為黃帝之樂  
信矣鄭康成賈公彥釋周禮遽以雲門大卷為黃  
帝樂大咸為堯樂是溺於世次先後之說而不知  
考正名實之過咸池雖黃帝所作而堯亦修而用

之故其作大章之樂未足以為備至修用黃帝之樂然後備樂矣故曰大章章之也咸池備矣雲門大卷大章所以表堯之體天道也咸池所以表堯之體地道也不然其能光被四表格於上下者哉昔武仲嘗謂咸池六英所以陳清廟協人神也然清廟周人祀文王之詩也而以咸池之樂陳之豈周人兼而用之乎考之周官舞咸池以出地示傳曰洗光咸池則咸池日所出之地八變之樂也古

者一變為一成則八變其八成歟郭友直以十成言之非也

大磬 大司樂鄭注大磬舜樂也言其能紹堯之道也

磬上  
昭反

吳季札見舞韶箛者

箛音簫

曰德至矣哉大矣如天之

無不備也如地之無不載也雖甚盛德其蔑以加矣

陳氏樂書曰周官舞大磬以祀四望又以之禮人鬼則磬之為樂無所不通奏之天地之間則四望

之神可格也。奏之宗廟之中，則人鬼之靈可禮也。書曰：「簫韶九成，蓋帝王功成作樂，所以象成者也。」遭秦煨燼之餘，六樂殘缺，惟餘韶武而已。漢室龍興，更為文始五行之舞，其名雖存，而實已亡矣。

舜帝乃誕敷文德，舞干羽于兩階。

干，楯也。羽，翳也。皆舞者所執。修闡文教，舞文

舞於賓主階間，抑武事。

七旬有苗格。

討之不服，不討自來。明御之者，必有其道。

大夏，大司樂鄭注：大夏，禹樂也。禹治水平土，言其德能大中國也。

吳季札見舞大夏者曰美哉勤而不德非禹其誰能修之

陳氏樂書曰周官大司樂言奏九德之歌九磬之舞瞽矇掌九德之歌以役大師春秋傳曰水火金木土穀謂之六府正德利用厚生謂之三事六府三事謂之九功九功之德皆可歌也謂之九歌磬舜樂也謂之九磬之舞則大夏禹樂也謂之九德之歌得非九夏之樂乎鐘師凡樂事以鐘鼓奏九

夏王夏肆夏昭夏納夏章夏齊夏族夏祴夏驚夏  
杜子春曰王出入秦王夏尸出入秦肆夏牲出入  
秦昭夏四方來賓秦納夏臣有功秦章夏夫人祭  
秦齊夏族人侍秦族夏客醉而出秦祴夏公出入  
秦驚夏蓋王者之於天下出而與物相見則粲然  
有文明之華功業之大然多故生於豐大之時而  
無故見於隨時之義則其出而與民同患又不可  
不思患而預戒之也禹作九夏之樂本九功之德

以為歌而夏書曰勸之以九歌俾勿壞曷嘗不先  
患慮之而戒之哉且天下之民以王為之君九夏  
之樂以王夏為之君故王出入秦王夏尸非神也  
象神而已然尸之於神在廟則均全於君是與之  
相敵而無不及矣故尸出入奏肆夏牲所以食神  
實以召之也神藏於幽微而有以召之則洋洋乎  
如在其上如在其左右不亦昭乎故牲出入奏昭  
夏外之為出內之為納四方之賓或以朝而來王

或以祭而來享非可却而外之也容而納之係屬  
之賓客悅遠人之道也故四方賓來奏納夏東南  
為文西南為章則章者文之成明之著者也人臣  
有功不錫樂以章之則其卒至於黜闇不明非崇  
德報功之道也故臣有功奏章夏古者將祭君致  
齊於外夫人致齊於內心不苟慮必依於道手足  
不苟動必依於禮夫然致精明之德可以交神明  
矣故夫人祭奏齊夏族人侍王內朝以齒明父子

也外朝以官體異姓也合之以道不過是矣故族  
人侍奏族夏既醉而出並受其福醉而不出是謂  
伐德非特於禮為然樂亦如之是以先王之於樂  
未嘗不以戒示戒焉故客醉而出秦箴夏大射公  
入驚則公與王同德爵位莫重焉然位不期驕而  
驕至祿不期侈而侈生則自放驕傲之患難乎免  
於身矣是以先王之於樂未嘗不以驚示戒焉故  
公出入奏驚夏蓋禮勝易離樂勝易流九夏之樂

必終於祓鷺者以反為文故也若然尚何壞之有  
乎詩言鐘鼓既戒與此同意九夏之樂有其名而  
亡其辭蓋若幽雅幽頌矣虞夏之世非特有文舞  
亦有武舞矣舞干羽于兩階是也後周朝會之禮  
帝出入奏王夏太子出入奏肆夏王公出奏鷺夏  
諸侯獻玉帛奏納夏宗室會賁奏族夏食舉奏深  
夏北齊文宣之世宗廟羣臣出入奏肆夏牲出入  
薦毛血奏昭夏入門升壇飲福就燎奏王夏梁武

之時凡客出入及帝出閣入宁升堂並奏肆夏然則禹奏九夏而王道成齊梁後周亦奏之而王道衰者非九夏之樂不善也為其徒有禹樂之名而無禹樂之實故也禹樂謂之大夏而季札曰美哉勤而不德者以其不自滿假有大而能謙必豫故也公羊子家駒曰朱干玉戚以舞大夏八佾以舞大武大夏文樂也以八佾舞之則可以朱干玉戚舞之豈所宜哉禮記明堂位言朱干玉戚冕而舞

大武皮弁素積裼而舞大夏祭統言朱干玉戚以舞大武八佾以舞大夏其言非不當也然不專施於周公之廟而或用於羣公之廟非成王崇德報功之意也雖然備九夏之樂惟天子為然元侯不與焉享元侯則肆昭納三夏而已大夫不與焉故大夫而肆夏自趙文子始也周禮謂之肆昭納魯語謂之繁遏渠故杜子春以為每夏而有二名也呂叔玉謂肆夏時邁也繁遏執競也渠思文也豈

非不知三夏禹樂非周樂然邪

大濩 大司樂鄭注大濩湯樂也湯以寬治民而除其邪言其德能使天下得所也

吳季札見舞韶濩者曰聖人之弘也而猶有慙德聖人之難也

陳氏樂書曰呂氏春秋曰湯命伊尹作為大濩晨露周人舞之以享先妣荀卿曰步中武象趨中韶濩所以養耳也春秋之時宋人作桑林之舞以享

晉侯則大獲桑林之舞商人之後作之非始湯也  
荀卿言周之勺武起而韶濩廢是不知周兼用六  
樂之意也

大武 大司樂鄭氏注大武武王樂也武王伐紂以除  
其害言其德能成武功

吳季札見舞象箏南籥者

象箏舞所執南籥以  
箏舞也皆文王之樂

曰美

哉猶有憾

美哉美其容也文王  
恨不及已致太平也

見舞大武者

武王  
樂曰

美哉周之盛也其若此乎

樂記夫武始而北出再成而滅商三成而南四成而南國是疆五成而分周公左召公右六成復綴以崇天子夾振之而四伐盛威於中國也分夾而進事蚤濟也久立於綴以待諸侯之至也

注並見樂歷代沿革

陳氏樂書曰春秋傳曰於文止戈為武戈則罷也所以示事止則象也所以示志詩序曰桓講武類禡也桓武志也言武志則講武其事也大武之義不過如此蓋樂之一變為一成文樂九成九變故

也武樂六成六變故也周人始作備樂而合乎祖  
不過大武而已其成於變可知也記曰武始而北  
出再成而滅商三成而南四成而南國是疆五成  
而周公左召公右六成復綴以崇天子則二王之  
後戾止而觀厥成者得非所以崇天子之意歟周  
官大司樂奏無射歌夾鍾舞大武以享先祖然則  
武奏大武歌是詩而舞之可知矣記有言八佾以  
舞大武語其數也朱干玉戚以舞大武語其器也

冕而舞大武語其服也周官樂記皆先大夏後大武以世次先後言之祭義明堂位皆先大武後大夏者尊時王之制故也

象內則成童舞象注先學勺後學象文武之次也成童十五以上

陳氏樂書曰吉事有祥象事知器維周之禎則福之先見事之有祥者也象舞則王事兆見事之器者也吉事之祥寓之於象事之器則文王舞象成

者孰非形容文王所以有天下之象邪樂記曰樂者非謂弦歌干揚樂之末節也童子舞之內則曰成童舞象蓋文王之時雖王事兆見而大統猶未既集也以未既集之統舞之以未成人之童此所以謂之象舞歟文王世子明堂位祭統仲尼燕居皆言下而管象春秋傳亦曰象箛南蓋文王之樂歌維清於堂上奏鐘鼓於堂下舞象於庭其所形容者熙邦國之典而已未及於法則也肇上帝之

裡而已未及於羣祀也熙邦國之典則人受之矣  
肇上帝之裡則天受之矣然則維周之禎豈過是  
哉先儒以象為武王樂而託以三象之說誤矣

勺 內則十有三年學樂誦詩舞勺

陳氏樂書曰勺水為杓勺酒為酌是酌者有挹而  
損之道也大武之樂武王作之於前成王酌先  
祖之道以成之於後其事則武其道則養天下然  
武所以毒天下而反有以養之者以武有七德而

安民和衆阜財固在其中矣其作樂告成而形容  
之不亦可乎燕禮言若舞則勺記言十有三年舞  
勺成童舞象皆小舞也朱干玉戚冕而舞大武則  
大舞也周官大舞以大司樂掌之小舞以樂師掌  
之然則周之舞豈不重於武宿夜乎此勺象所以  
不言大異乎大武配六樂而謂之大也豈非以大  
統大勲至是然後集邪傳曰舜樂莫盛於韶周樂  
莫盛於勺以韶為盛則是以勺為盛不知莫重於

武之說也白虎通謂周公之樂曰勺其為智亦踈  
矣

夾淙鄭氏曰古有六舞後世所用者韶武二舞而  
已後世之舞亦隨代皆有制作每室各有形容然  
究其所常用及其制作之宜不離是文武二舞也  
臣疑三代之前雖有六舞之名往往其所用者亦  
無非文武二舞故孔子謂韶盡美又盡善武盡美  
矣未盡善不及其他誠以舞者聲音之形容也形

容之所感發惟二端而已自古制治不同而治具亦不離文武之事也然雲門大咸大韶大夏大濩大武凡六舞之名南陔白華華黍崇邱由庚由儀凡六笙之名當時皆無辭故簡籍不傳惟師工以譜奏相授耳古之樂惟歌詩則有辭笙舞皆無辭故大武之舞秦始皇改曰五行之舞漢高帝改曰文始之舞魏文帝復文始曰大韶舞五行舞曰大武舞並有譜無辭雖東平王蒼有武德舞之歌未

必用之大抵漢魏之世舞詩無聞至晉武帝泰始九年荀勗曾典樂更文舞曰正德武舞曰大豫使郭夏宗識為其舞節而張華為之樂章自此以來舞始有辭而有辭失古道矣

帔舞 樂師掌教國子小舞有帔舞鼓人凡祭祀百物之神鼓帔舞者舞師掌教帔舞帥而舞社稷之祭祀女巫掌歲時祓除旱暵則舞雩蓋帔之為言祓也社稷及百物之神皆為民祓除故以帔舞舞之然則教國子以

是責之保社稷故也鄭司農曰帔舞者全羽羽舞者析羽鄭康成曰帔折五采繒為之今靈星舞子持之是也其亦互備之歟

羽舞 樂師凡國有羽舞舞師掌教羽舞帥而舞四方之祭祀籥師掌教國子舞羽歌籥祭祀則鼓羽籥之舞賓客饗食亦如之詩曰右手秉翟所謂羽舞者翟羽可用為儀執之以舞所以為蔽翼者也春秋之時隱公問羽數於衆仲曰天子用八諸侯用六大夫四士二羽舞

之制自天子達於士名位不同舞亦異數不過降殺以兩而已諸侯用六羽則是考仲子之宮而用之非僭而何聖人言初獻所以貶之也

皇舞 舞師掌教皇舞帥而舞旱暵之事樂師掌教國子小舞有皇舞蓋皇陰類也而能為其類之長陰中之陽也旱暵則欲達陰中之陽故以皇舞舞之與巫師女巫之舞同意皇舞者以羽冒覆頭上衣飾翡翠之羽又曰皇雜五采羽如鳳凰色

旄舞 傳曰葛天氏之樂三人操鼉牛尾而歌八闋欲  
旄者其鼉牛之尾歟古之人非特操之以歌亦操之以  
舞旄牛之尾舞者所持以指麾猶旌旂注鼉牛之尾鄉  
士所設以標識者也周官旄人掌教舞散樂舞夷樂然  
則旄舞豈亦旄人所教邪

干舞 司干掌舞詔祭祀舞者既陳則授舞詔既舞則  
受之賓饗亦如之司兵祭祀授舞者兵司戈盾祭祀授  
旅者受故士戈盾授舞者兵亦如之言兵則不止於干

言干則一器而已郊特牲曰朱干設錫冕而舞大武明  
堂位曰朱干玉戚冕而舞大武樂記曰樂者非謂干揚  
也樂之末節也故童子舞之祭統曰及舞君執干戚就  
舞位則干者自衛之兵非伐人之器也自天子達於童  
子未嘗不執是舞之所以象其有武事也然亦特樂之  
末節而已故樂師教國子以之者欲其由末以知本也  
舞師祭山川以之者以其有阻固扞殺之功也漢舞先  
武德後文始唐舞先七德後九功其意以為武以威衆

而平難文以附衆而守成平難在所先守成在所後唐  
太宗謂封德彝曰朕始雖以武功興終以文德綏海內  
謂文容不如蹈厲斯言過矣考之於古周官司兵掌五  
兵五盾以待軍事詩曰龍盾之合又曰蒙伐有苑春秋  
傳曰狄虺彌建大車之輪以為櫓國語曰官師奉文犀  
之渠以為盾先儒以櫓為大盾以伐為中干則盾之見  
於經傳有櫓干伐渠之異名其為盾一也盾之為物以  
革為之其背曰瓦左傳曰中其楯瓦是也其瓦設錫記

曰朱干設錫是也朱質而繪以龍龍之外又繪以雜羽

蒙雜羽也

其繫之也以繡韋其屬繡韋也以紛書曰敵乃干

敵者繫以紛也國語曰輕罪贖以犢盾則犢土繡韋也  
舞者所執之干其制如此隋初武舞三十二人執戈三  
十二人執戚皆配以盾而半執龍盾半執龜盾蓋惑於  
鄭氏其背如龜之說也是不知所謂龜者其背耳非其  
飾也孔安國釋書之禹謨以舞干羽為文舞又失之矣  
今之鹵簿即干櫓之櫓豈古者櫓鹵通用邪

人舞 以手舞之而無所執舞以干戚羽旄為飾以手  
舞足蹈為容故樂記樂師均以人之手舞終焉通禮義  
纂曰古者臣之於君有拜手稽首之禮自後魏以來臣  
之受恩者皆以手舞足蹈為喜忭之極也豈亦源流於  
此歟

野舞 地官舞師掌教小舞凡野舞則皆教之教舞至  
於野人不遺則舞師所教亦無所不至矣

正義曰大司樂所教雲門以下六舞是大舞舞師

所教帔舞以下七者是小舞內則云十三舞勺成  
童舞象是小舞又云二十舞大夏即此六舞也

陳氏樂書曰執干揚而舞之兵舞也列五采繒為  
之帔舞也析衆鳥羽為之羽舞也以鳳之羽為之  
皇舞也以旄牛之尾為之旄舞也鄭司農曰社稷  
以帔宗廟以羽四方以皇辟雍以旄兵事以干星  
辰以人鄭康成曰四方以羽宗廟以人山川以干  
皐桴以皇然古之於大祭祀有備樂必有備舞春

秋書有事於太廟萬舍籥則宗廟用干與羽矣若夫散而用之則有所不備故山川以干社稷以帔四方以羽旱暵以皇二鄭之論踈矣大司樂曰舞咸池以祭地示則社稷不特帔舞舞大夏以祭山川則山川不特兵舞也於咸池之類言其章不言其毘於帔舞之類言其毘不言其章互備也書言舞干羽于兩階樂記比音而樂之及干戚羽旄謂之樂郊特牲明堂位祭統皆言朱干玉戚以舞大

武皮弁素積以舞大夏簡兮之詩言碩人俟俟公  
庭萬舞繼之左手執籥右手秉翟要皆先武後文  
者蓋堯舜揖遜其舞先干後羽以苗民逆命故也  
湯武征伐其舞先武後文者以有武功為大故也  
按正義以雲門大卷大咸大夏大濩大武為大舞  
以帔舞羽舞皇舞旄舞干舞人舞為小舞然以愚  
觀之雲門以下舞之名也若帔若羽若皇若旄若  
干若人則舞之具也有此六者之具然後可以舞

此六代之舞非於小舞之外別有所謂大舞也蓋  
六代之舞其名雖異而所用之具則同然必謂之  
帔舞羽舞云者以其或施之社稷或施之山川旱  
暵之屬其用各有不同耳舞師所教是各指其所  
習而言故謂之帔舞羽舞大司樂所教是通指其  
集大成而言故謂之雲門大咸譬之為學帔羽皇  
旄千人則誦詩讀書是也雲門至大武則作文是  
也而誦詩讀書固所以作文也樂書互相備之說

得之

舞罷

相狀如顰韋表糠裏以漆跣局承而擊之所以輔樂  
樂記治亂以相諸家樂圖多以相為節是相所以輔樂  
亦所以節舞今太樂武舞用之二工在舞者之左手撫  
兩端以節舞者之步豈亦得相之遺制歟或謂相即拊  
也誤矣樂記言會守拊鼓於前而以治亂以相繼之則  
拊以倡樂相以節樂豈得同為一罷乎

應 小春謂之應所以應大春所倡之節也周官笙師  
掌教牘長七尺應則如桶而方六尺五寸中象祝有椎  
連底左右相擊以應祝也禮圖其形正圓而內外皆朱  
牘 以竹為之五寸殺其聲而使小所以節樂也故春  
牘周官以笙師掌之以教祔樂焉祔以示戒節之故也  
蓋牘有長短長者七尺短者三尺虛中如筩而無底其  
端有兩竅而髹畫之列之於庭以兩手築地為賓出之  
節也

雅 笙師掌教雅以教械夏蓋賓出以雅欲其醉不失  
正也工舞以雅欲其訊疾不失正也先儒謂狀如漆桶  
而弁口大二圍長五尺六寸以羊韋鞞之旁有兩紐疏  
畫武舞工人所執所以節舞也

戈 周官司戈盾祭祀授舞者兵文王世子春夏學干  
戈漢迎秋樂亦用之隋初武舞三十二人執戈三十二  
人執戚皆配以盾焉然則古之人寓習兵於樂舞之間  
至於干戈戚揚弓矢之類靡所不執其除戎器戒不虞

之意可知矣

籥 籥師祭祀鼓羽籥之舞文王世子秋冬學羽籥賓之初筵曰籥舞笙鼓春秋萬入去籥則秉籥而舞其來尚矣詩曰左手執籥右手秉翟蓋籥所以為聲翟所以為容也

弓矢 大司樂大射令奏騶虞詔諸侯以弓矢舞樂師燕射師射夫以弓矢舞蓋周人之制

戚 禮曰朱干玉戚以舞大武蓋干盾也所以自蔽戚

斧也所以待敵朱干白金以飾其背記曰朱干設錫是也玉戚剝玉以飾其柄楚工尹路曰剝玉以為鉞秘是也舞武執干戚則舞夏執籥翟矣然朱所以象事玉所以象德武以自蔽者為主而待敵者非得已也故其宣布著盡以為事者欲自蔽而已至於持以待敵者溫純之德耳此武舞之道漢高祖令舞人執干戚舞武德之舞光武迎秋氣親執干戚舞雲翹育命之舞亦庶乎近古也然武盡美矣未盡善也故干戚之舞又非所以為

備樂歟宗朝太樂舞詔第加繪飾而已其去古制遠矣  
可不復之乎

揚

鉞

詩曰干戈戚揚樂記曰樂者非謂干揚也故重

子舞之廣雅曰鉞戚斧也毛萇謂揚鉞也孔安國謂劉  
斧屬蓋揚鉞戚斨劉皆斧也特所由之名異耳黃鉞以

金飾其柄也玉戚以玉飾其柄也蓋皆有剛斲之材焉

翟 詩曰右手秉翟左傳曰五雉為五工正爾雅有鷩

諸雉鷩雉鳩雉鷩雉秩秩海雉鷩山雉雉

汗

雉鷩雉鷩

雉鷄雉南方曰鷄

傳

東方曰鷄北方曰鷄西方曰鷄而

舞之所取者特鷄山雉耳以其羽尤可用為儀故也南  
齊鄭義更以翟為笛飾以髦籥飾以羽梁武帝曰翟是  
五雉之一取其毳羽以秉之耳寧謂羌笛邪其說是也  
今太樂以雉羽攢疊為之而髹畫其柄豈亦近古制歟  
春秋公羊傳魯隱公六年考仲子宮初獻六羽何休曰  
鴻羽也所以象文德之風化疾也是泥於漸卦其羽可  
用為儀之說不知禮有夏籥之文詩有秉翟之義也

鷺 宛邱曰無冬無夏值其鷺羽無冬無夏值其鷺翻  
蓋鷺羽舞者所執鷺翻舞者所建既值其所執之鷺羽  
又值其所建之鷺翻是常舞而不知反也宛邱刺之豈  
不宜哉今太樂文舞不以翟羽而以鷺羽舞之素而無  
文特陳國之淫樂非先王雅舞也易而復古此其時乎  
翻 燾 羽葆幢 君子陽陽曰左執翻宛邱曰值其  
鷺翻爾雅曰翻燾也郭璞以為今之羽葆幢蓋舞者所  
建以為容非其所持者也今太樂所用高七尺于首棲

水鳳注髦一重綴纁帛畫升龍焉二工執之分立於左  
右以引文舞亦得古之遺制也

旌 春秋時宋人作桑林之舞以享晉侯舞師題以旌  
夏晉侯懼退入於房去旌卒享而還旌夏大旌也舞者  
行列以大旌表識之也大射禮舉旌以宮偃旌以商亦  
其類歟然武樂象成者也故得以旌參之今太樂所用  
注旄三重高燾等二工分立左右以引武樂亦得古之  
遺制

節 爾雅曰和樂謂之節蓋樂之聲有鼓以節之其舞之容有節以節之故先代之舞有執節二人之說至今因之有析朱繒三重之制蓋有自來矣

麾 暈干

周官巾車掌木路建大麾以田以封蕃國書

曰左仗黃鉞右秉白旄以麾則麾周人所建也後世叶律郎執之以令樂工焉其制高七尺干飾以龍首綴纁帛畫升龍於上樂將作則舉之止則偃之堂上則立於西階堂下則立於樂縣之前少西唐樂錄謂之暈干今

太常武舞用之

箭 大周正樂舞箭謂之箭春秋傳見舞象箭南籥者  
杜預曰舞所執然其詳不可得而知矣

舞衣

冕 記曰朱干玉戚冕而舞大武祭統曰冕而總干率  
其羣臣以樂皇尸樂記曰食三老五更於太學天子冕  
而總干所以教諸侯之弟也由此觀之天子冕而總干  
郊祀則裘冕也宗廟則衮冕鷩冕也食老更則鷩冕而

已唐制天子之制大裘冕者祀天地之服也下至平冕者郊廟舞郎之服也先王之制冕而總干非特施於郊廟雖食老更於太學亦用焉以宗廟之禮食老更之賢德亦可謂敬之至矣若夫諸侯朱干設錫冕而舞大武則又僭天子之禮古人不為也由此論之諸侯冕而舞大武禮經猶以為僭况舞郎之舞其可用平冕乎然則如之何而可曰爵弁以舞文韋弁以舞武不亦可乎

按冕服先王之盛禮也非郊廟祭祀之大事不服

之然天子親冕而總干則施之於郊廟及養老之時蓋敬之至而以盛禮事之也唐人乃以平冕為舞郎之服則是樂工可以服王公之服矣竊意古人舞者必自有其服書所謂允之舞衣是也其曰冕而總干云者蓋以祭祀養老之時君服冕以從事遂親起舞以示敬非曰舞者必合服冕也又如祭祀之時君親牽牲割牲養老之時君親執醬執爵其時亦必皆以冕服從事猶冕而總干之類也

然遂謂祭祀之牽牲割牲者養老之執醬執爵者  
雖賤有司皆服人君之服可乎君親耕籍田則冕  
而朱紘躬秉耒亦豈凡秉耒者皆可冕服乎後世  
不明其義而以平冕為舞郎之服誤矣流傳既久  
南唐之時優伶遂有乞取大殷皇帝半天冠為戲  
以資笑噱者蓋後世之視舞同乎戲劇而又因其  
誤以平冕為舞服遂亦以戲衫祝冕矣

皮弁 明堂位曰皮弁素積裼而舞大夏蓋皮弁以白

鹿皮為之其衣則布十五升其色象之則素衣其衣也  
素積其裳也大武所以象征誅必朱干玉戚冕而舞之  
者以武不可覲故也大夏所以象揖遜必皮弁素積裼  
而舞之者以文不可匿故也記曰裘之裼也見美也服  
之醜也充美也禮不盛服不充故大裘不裼則醜充可  
知也由是觀之裼醜未嘗相因也干戚羽籥未嘗並用  
也於大夏言裼而舞則大武冕而舞必用醜矣於大武  
之舞言干戚則大夏之舞必用羽籥矣

陳氏樂書曰書曰允之舞衣在西房孔安國曰允國所謂舞者之衣皆中法然古者皮弁素積冕服之外無所經見特漢舞者之衣法五方色謂之五行之舞漢去三代未遠疑亦得古遺制也唐趙慎言曰今祭罷茵褥總隨五方五郊衣服獨乖其色舞者常持皂飾工人皆服絳衣臣愚竊不便之其舞人工人衣服請依方色宗廟黃色仍各以所主標袖亦可謂知言矣今誠祖述其制而行之使舞

工之服五郊各放五色天祀以元地祭以黃宗廟  
以繡亦庶乎近古若夫宗廟以黃則不知地亦果  
用何色邪

舞綴兆 樂記其治民勞者其舞行綴遠其治民逸者  
其舞行綴短注綴謂鄮舞者之位也兆其外營域也民  
勞則德薄鄮相去遠舞人少也民逸則德盛鄮相去近  
舞人多也

堂上

作階

堂下

文舞

賓階

武舞

庭

綴綴綴綴綴綴綴綴

綴綴綴綴綴綴綴綴

陳氏樂書曰周官大胥以六樂之會正舞位小胥巡舞列經曰行其綴兆行列得正焉蓋位則鄮也所以為綴列則侑也所以為行正之以辨其序巡之以肅其慢則治民勞者鄮遠而侑寡其德殺故也治民逸者鄮短而侑多其德盛故也非故不同凡各稱德而已天子之於諸侯生則旌以舞沒則表以謚觀舞之行綴足以知臨民之德聞謚之異同足以知為治之行然則為諸侯者孰不敏德崇

行以法天下後世為哉今之舞者不列於庭而列於堂下其退文進武不復有出入之序非古人所謂八佾舞於庭序出入舞者之意也至於進退疾徐之際又不復盡筋骨之力以要鐘鼓拊會之節非古人所謂文以揖遜武以擊刺之意也講而習之正今日急務也

萬舞 商頌曰萬舞有奕衛風曰公庭萬舞魯頌曰萬舞洋洋春秋曰萬人去籥左氏傳曰考仲子之宮將萬

焉又曰堊令尹子元欲盡文夫人館於宮側而振萬焉  
晉志曰萬舞象功是舞也先王所以習戒備自商至周  
所不易也何休釋公羊萬舞之說以為象武王以萬人  
伐紂不亦失乎武舞一也謂之干舞其名也謂之萬舞  
其數也禮樂所謹不過名數而已

東萊呂氏曰萬舞文武二舞之總名也干舞武舞  
之別名也籥舞文舞之別名也文舞又謂之羽舞  
鄭康成據公羊傳以萬舞為干舞盖公羊釋經之

誤也春秋書萬入去籥言文武二舞俱入以仲遂之喪於二舞之中去其有聲者故去籥焉文舞舞羽吹籥公羊乃以萬舞為武舞與籥舞對言之失經意矣若萬舞止為武舞則簡兮與商頌何為獨言萬舞而不及於文舞邪左氏載考仲子之宮將萬焉婦人之廟亦不應獨用武舞也然則萬舞為二舞總名明矣

漢制高廟奏武德文始五行之舞孝文廟奏昭德文始

四時五行之舞孝武廟奏盛德文始四時五行之舞武  
德舞者高祖四年作以象天下樂已行武以除亂也文  
始舞者曰本舜韶舞也高祖六年更名曰文始以視不  
相襲也五行舞者本周舞也秦始皇二十六年更名曰  
五行也四時舞者孝文所作以示天下之安和也蓋樂  
已所自作明有制也師古曰言自制作也樂先王之樂明有法也  
師古曰遵前代之法孝景采武德舞以為昭德以尊太宗廟至孝  
宣采昭德舞為盛德以尊世宗廟諸帝廟皆常奏文始

四時五行舞云高祖六年又作昭容樂禮容樂昭容者

猶古之昭夏也主出武德舞

蘇林曰言昭容樂生於武德舞

禮容者主

出文始五行舞舞入無樂者將至至尊之前不敢以樂也出用樂者言舞不失節能以樂終也大抵皆因秦舊事焉

陳氏樂書曰周存六代之舞至秦惟餘韶武而已漢興制氏世職太樂第識鏗鉶鼓舞之末節未始知其義也然漢舞宗廟之耐卑者之子不得而預

其豫之者上則二千石之子下則五大夫之子取  
適于高五尺已上年十二到三十顏色和身體脩  
治者以為舞人雖與周人異制亦未失用國子之  
實也今之舞者不過用市井畎畝之人素不知歌  
舞者為之其何以格神明移風俗乎

公莫舞 即巾舞也相傳云項莊舞劍項伯以袖隔之  
使不得害高帝且語莊云公莫古人相呼曰公莫害漢  
王也後之用巾蓋象項伯衣袖之遺制

巴渝舞 漢高帝自蜀漢將定三秦閬中范且率賓人以從帝為前鋒號板楯蠻勇而善鬪既定秦中以功封閬中侯其俗喜舞高祖樂其猛銳數觀其舞後使樂人習之閬中有渝水因其所居故名曰巴渝舞

武帝時用事甘泉園丘用女舞童三百

東漢光武隴蜀平後乃增廣郊祀凡樂奏青陽朱明西皓元冥及雲翹育命舞

立春之日迎春於東郊歌青陽八佾舞雲翹之舞立

夏之日迎夏於南郊歌朱明八佾舞雲翹之舞先立  
秋十八日迎黃靈於中兆歌朱明八佾舞雲翹育命  
之舞立秋之日迎秋於西郊歌西皓八佾舞育命之  
舞立冬之日迎冬於北郊歌元冥八佾舞育命之舞  
祭祀志又獻帝起居注曰建安八年公卿迎氣北郊  
始復用八佾皇覽曰迎禮春夏秋冬之樂又順天道  
天子迎春於東堂唱之以角舞之以羽翟此迎春之  
樂也迎夏於南堂唱之以徵舞之以鼓鞀此迎夏之  
樂也迎秋於西堂唱之以商舞之以干戚此迎秋之  
樂也迎冬於北堂唱之以羽舞之以干戈此迎冬之  
樂也先立秋十八日郊黃帝至立秋迎氣於黃郊奏黃

鍾之宮歌帝臨寬而執干戚舞雲翹育命所以養時訓也

明帝永平三年十月蒸祭光武廟初奏文始五行武德

之舞

前書曰文始舞者本舜韶舞也高祖六年更名曰文始其舞人執羽籥五行本周舞也秦始皇二十

六年更名曰五行其舞冠冕衣服法五行色武德者高祖四年作言行武以除亂也其舞人執干戚光武草創禮樂未備今始奏之故云初也

永平八年公卿奏議世祖廟登歌八佾舞功名東平王蒼議以為漢制舊典宗廟各奏其樂不皆相襲以明功

德秦為無道殘賊百姓高皇帝受命誅暴元元各得其  
所萬國咸熙作武德之舞孝文皇帝躬行節儉除誹謗  
去肉刑澤施四海孝景皇帝制昭德之舞孝武皇帝功  
德茂盛威震海外開地置郡傳之無窮孝宣皇帝制盛  
德之舞光武皇帝受命中興撥亂反正武暢方外震服  
百蠻戎狄奉貢宇內治平登封告成脩建三雍肅穆典  
祀功德巍巍比隆前代以兵平亂武功盛大歌所以詠  
德舞所以象功世祖廟樂名宜曰大武之舞

章帝即位議顯宗廟樂東平王蒼上言昔孝文廟樂曰  
昭德之舞孝武廟樂曰盛德之舞今皆祫食於高祖昭  
德之舞不進與高廟同樂今孝明皇帝在世祖廟當同  
樂盛德之樂無所施如自立廟作武德之舞上從王議  
祠靈星舞者用童男十六人舞者象教田初為芟除次  
耕種芸耨駟爵及穫刈舂簸之形象其功也

和帝即位有司奏上尊章帝廟曰肅宗共進武德之舞  
制曰可



文獻通考卷一百四十四

欽定四庫全書

文獻通考卷一百四十五

鄱陽馬端臨貴與著

樂考十八

樂舞

魏武帝平荊州獲漢雅樂郎杜夔時舞師馮肅曉知先代諸舞使夔總之始設軒懸復先代古樂

文帝受禪改漢安世樂為正世嘉至樂為迎靈昭容樂

為昭業漢巴渝舞為昭武雲翹舞為鳳翔育命舞為靈  
應武德舞為武頌文始舞為大韶五行舞為大武明帝  
太和初詔議廟樂改大予樂為大樂大樂漢舊名也太祖武皇  
帝樂曰武始之舞高祖文皇帝樂曰咸熙之舞烈祖皇  
帝樂曰章斌之舞凡此三舞天地宗廟薦享及朝饗用  
之總名大鈞之樂也王肅等議設宮縣之樂八佾之舞  
高皇大帝太祖高祖文昭廟皆當兼用先代及武始大  
鈞之舞以文始大武武德武始大鈞可以備四代之樂

猶周存六代之樂也故奏黃鍾舞文始以禮天地奏太  
簇舞大武以祀五郊明堂奏姑洗舞武德巡守以祭四  
望山川奏蕤賓舞武始大鈞以祀宗廟二至祀邱澤可  
兼舞四代又漢雲翹育命之舞舊以祀天今可兼以雲  
翹祀園丘育命祀方澤卒如肅議亦近古盛制也

鞞舞 未詳所起然漢已施於燕享矣傅毅張衡所賦  
皆其事也魏曹植鞞舞歌序曰漢靈帝西園鼓吹有李  
堅者能鞞舞遭亂西隨段熲先帝聞其舊伎召之堅既

中廢兼古曲多謬誤異代之文未必相襲故依前曲改作新歌五篇不敢充之黃門近以成下國之陋樂焉

晉武帝受命之初百度草創郊祀明堂權用魏樂而改樂章繼而命荀勗領其事使郭夏宋識等造正德大豫二舞又改魏昭武舞曰宣武之舞羽籥舞曰宣文之舞咸寧初詔定祖宗之號而廟樂乃廢宣武宣文之舞同用正德大豫之舞勗既以新律造二舞次更修正鐘磬勗薨復詔其子藩修定以施郊廟

鞞舞 漢曲至晉加以柷謂之世寧舞也張衡舞賦云

歷七鞞而蹤躡王粲釋云七鞞陳於廣庭顏延之云遞

間開於鞞扇鮑昭云七鞞起長袖皆以七鞞為舞也干

寶云晉武帝太康中天下為晉世寧舞矜手以接鞞反

覆之

至危之象言晉代之士苟貪飲食智不及遠

至宋改為宋世寧齊改為

齊代昌唐謂之鞞舞隸清樂部中

白紵舞

按舞辭有巾袍之言紵本吳地所出疑是吳

舞也晉俳歌又云皎皎白緒節節為雙吳音呼緒為紵

疑白紵即白緒也

鐸舞 漢曲也晉鞞舞亦五篇及鐸舞歌一篇幡舞一篇鼓舞伎六曲並陳於元會其舞故常二八桓元即真太樂遣衆伎尚書殿中郎裴明子啓增八佾相承不復革宋明帝自改舞曲歌詞猶存舞並闕其鞞梁謂之鞞扇舞也幡舞扇舞後並亡

宋武帝紹晉衰亂之後改正德舞為前舞大豫舞為後舞文帝元嘉中令奚縱參議宗廟舞事會軍興而寢至

孝武有司奏宋承晉氏未有稱號前舞後舞有乖古制於是前舞為凱容之舞後舞為宣烈之舞既而建平王宏又議以凱容為韶舞宣烈為武舞故以正德為宣化之舞大豫為興和之舞郊廟初獻奏凱容宣烈之舞終獻奏永安之樂何承天三代樂序稱正德大豫舞蓋出三代容樂其聲節有古之遺音焉然不知二舞乃出宣舞宣文魏大武三舞也宣舞魏韶舞也宣文魏武始舞也魏改巴渝為昭舞五行為大武凱容舞執籥秉翟則

魏武始舞也宣烈舞有牟弩有干戚牟弩漢巴渝舞也  
干戚周舞也由是言之何承天之論未為知樂者也明  
帝又自改鞞舞曲辭大明中以鞞拂雜舞合之鐘石  
施之殿庭順帝昇明中王僧虔以為乖於雅體何其知  
言邪

文帝元嘉十三年司徒彭城王義康於東府正會依舊  
給伎總章工馮大列相承給諸王伎十四種其舞伎三  
十六人太常博士傅崇議以為未詳此人數所由唯杜

氏注左傳佾舞云諸侯六六三十六人以為非也夫舞者所以節八音也八音克諧然後成樂故樂必以八人為列自天子至士降殺以兩兩者減其二列耳杜以為一列又減二人至士止餘四人豈復成樂按服虔注左傳云天子八八諸侯六八大夫四八士二八其議甚允今諸王不復舞佾其總章舞佾即古之女樂也殿庭八八諸王則應六八春秋鄭伯納晉悼公女樂二八晉以一八賜魏絳此樂以八八為列之證也若如議者唯天

予有八則鄭應納晉二六晉應賜絳一六也自天子至士其文物典章尊卑差級莫不以兩未有諸侯既降二列輒減二人近降大半非唯八音不具於兩義亦乖

齊武帝祠南郊初獻奏文德宣烈之舞次奏武德宣烈之樂太祖高皇帝配享奏高德宣烈之樂北郊初獻奏地德凱容之樂次奏昭德凱容之樂明堂之樂並同二郊之奏宗廟太祖神室奏高德宣烈之樂穆后奏穆德凱容之樂高祖奏明德凱容之舞

齊永明中釋寶月為太樂令鄭義秦論曰笛飾以旄簫飾以羽今笛簫並用羽舊制進賢冠幘不簪筆朱衣標眼中厠皂緣曲領白布袜複舄義秦乃改簪筆笛簫同用竹朱漆簫三孔笛一頭五色眊簫兩頭葆羽眊著馮皮履梁武帝辨之曰詩云左手執籥右手秉翟筆笏以記事受言舞者何事簪筆邪

梁室肇有天下任昉宗王肅之議凡郊廟備六代之樂武帝非之以為仲尼晏朝之意於是不備宮架不徧舞

六代至於郊廟及三朝設架則非宮非軒非判非特直  
以至恭所應施用而已何其率邪故其命武舞為大壯  
文舞為大觀南郊舞奏黃鍾取陽始化也北郊舞奏林  
鍾取陰始化也明堂宗廟舞奏蕤賓取恭名陰主之義  
也三朝則大壯奏夷則大觀奏姑洗取其月王也彼謂  
魏晉以降不應以巴渝夷狄之舞雜周舞真篤論歟  
梁武帝時太常任昉奏據魏王肅議周禮賓客皆作備  
樂况天地宗廟事之大者周官以下六律六呂五聲八

音六舞大合樂致鬼神以和邦國請依王肅祀祭郊廟  
備六代樂帝曰按言大合樂者是使六律與五聲克諧  
八音與舞蹈合節耳豈謂致鬼神祇用六代樂也其後  
即言乃分樂而序之以祭以享以祀此則曉然已明肅  
則失其旨矣推檢記載初無宗廟郊禋偏舞之文唯明  
堂之位云以禘禮祀周公於太廟朱干玉戚冕而舞大  
武皮弁素幘裼而舞大夏納夷蠻之樂於太廟言廣魯  
於天下也按所以舞大武大夏者止欲備其文武二舞

耳非兼用六代也夏以文受周以武功所以故兼之而不用護者護武舞也周監於二代質文乃備納蠻夷樂者此明功德所須蓋止施禘祭不及四時也今四海之祭而不徧舞者何夫祭尚於敬不欲使樂繁禮縟故季氏逮閭而祭日不足則繼之以燭雖有強力之容肅敬之心皆倦怠矣有司跛彼義反倚乙利反以臨祭其為不敬大矣他日祭子路與焉質明而始行事晏朝而退孔子聞之曰誰謂由也而不知禮乎儒者知子顏宴饗猶舞

六代不知有司跛倚不敬已大若依肅議用六代樂者  
郊堂既有迎神之樂又登歌各頌功德徧以六律繼以  
出入方待樂終然後罷祭者此則乖仲尼躋晏朝之旨  
若三獻禮畢即便卒事則無勞於徧舞也

陳武帝宗祀朝饗並遵梁制武舞奏大壯夷則作夾鍾  
參應之七月金始王取其剛斷也文舞奏大觀姑洗作  
應鍾參應之三月萬物必榮取其布惠也文帝天禧五  
年詔劉平張崖定二郊明堂儀改天嘉中所用齊樂盡

以韶為名更舞七德之舞工執干楯曲終復綴出就縣東繼舞九叙之舞工執羽籥

後魏道武帝定中山獲其樂縣自制樂舞追尊祖考諸帝樂用八佾奏皇始之舞冬至祭天於南郊圜丘樂用皇矣奏雲和之舞夏至祭地於北郊方澤樂用天祚奏大武之舞及破赫連昌獲古雅樂平涼州得其伶人器服並擇而存之後通西域又以悅般國鼓舞設於樂府文帝時公孫崇典知樂章嘗言於帝曰樂府先傳正聲

有王夏登歌鹿鳴之屬而有文始五行勺舞及太祖初興所制皇始之舞又有吳夷東夷西戎之舞凡七舞用之郊廟中京造次但用文始五行皇始三舞而已皇魏四祖三宗之樂宜有表章帝乃詔劉芳更定文武二舞始於大饗用之後祖瑩等建言請以韶舞為崇德武舞為章烈總名曰嘉成詔可其議特準古六代之樂易嘉成為大成然赫連昌涼州悅般國之樂吳夷東夷西戎之舞並列之太樂是不知先王之時夷樂作於國門右辟之說也

北齊之舞作覆燾以享天地之神作恢祚以獻高祖武帝之室宣政以獻文襄之室光大以獻文宣之室朝饗用文武之舞咸有階步其雜樂歌舞之伎自襄以來皆所樂好至河清以後傳習尤甚無足紀焉

後周武帝初造山雲之舞又定大夏大漢大武正德武德以備六代之樂南北郊雩壇太廟禘祫朝會並用之然不制神室之舞非古人所以象德昭功之意也

城舞 後周武帝平齊作永安樂行列方正象城郭謂

之城舞用八十人刻木為面狗喙獸耳以金飾之垂線為髮畫襖皮帽舞蹈姿致猶作羌胡狀

隋文帝平陳之後盡得宋齊舊樂更詔牛宏等定文武之舞辨器服之異又準樂記象德擬功初來就位總干而山立思君道之難也發揚蹈厲威而不殘也武亂皆坐四海咸安也武始而受命再成而定山東三成而平蜀道四成而北狄是通五成而江南是拓六成復綴以闡太平文武曰不用象功德直象事可也近代舞出入

皆作樂謂之階步咸用肆夏周官所謂出入奏鐘鼓是也並依定焉梁帝罷之不知經之過也魏晉以來有牙俞弩俞及諸儒導引之類既非正典悉罷不用亦可謂治古之舉也其後定令置七部樂而牛宏又請存鞞鐸巾拂四舞與新伎並陳宴會同設於西涼前奏之帝曰音聲節奏及舞悉宜依舊惟舞人不捉鞞拂爾牛宏當世儒宗而措論如是抑何不知先王雅樂之甚哉

隋文舞工六十四並黑介冠進賢冠絳紗連裳白內單

皂褱領褱裾革帶烏皮履十六工執嬰十六工執帔十  
六工執旒十六工執羽左手皆執籥二工執纛引前左  
舞員外衣冠亦如之武舞工六十四並服武弁朱襹衣  
革帶烏皮履左執朱干右執玉戚二工執旌居前二工  
執鼗二工執鐸金鐸二四工舉二工作二工執鐃二工  
執相在左二工執雅在右各一工作焉自旌以下夾引  
武舞者舞員外衣冠亦如之然朱干玉戚古天子之  
舞也舞工以之不亦過乎

唐高祖時祖孝孫定樂更文舞曰治康武舞曰凱安舞者各六十四人文舞左籥右翟與執燾而引者二人皆委貌冠黑素絳領廣褱白袴革帶烏皮履武舞左干右戚執旌居前者二人執鼗執鐸皆二人金鐃二輿者四人奏者二人執鐃二人執相在左執雅在右皆二人夾蕤服平冕餘同文舞朝會則武弁平巾幘廣褱金甲豹文袴烏皮鞬執干戚夾蕤皆同郊廟凡初獻作文舞之舞亞獻終獻作武舞之舞太廟降神以文舞每室酌獻

各用其廟之舞。禘祫遷廟之主合食則舞亦如之。儀鳳二年太常卿韋萬石定凱安舞六變一變象龍興參墟二變象克定關中三變象東夏賓服四變象江淮平五變象獫狁伏從六變復位以崇象兵還振旅。初太宗時詔秘書監顏師古等撰定弘農府君至高祖太武皇帝六廟樂曲舞名其後變更不一而自獻祖而下廟舞略可見也。獻祖曰光大之舞懿祖曰長發之舞太祖曰大政之舞世祖曰大成之舞高祖曰大明之舞太宗曰崇

德之舞高宗曰鈞天之舞中宗曰大和之舞睿宗曰景雲之舞元宗曰大運之舞肅宗曰惟新之舞代宗曰保大之舞德宗曰文明之舞順宗曰大順之舞憲宗曰象德之舞穆宗曰和寧之舞敬宗曰大鈞之舞文宗曰文成之舞武宗曰大定之舞昭宗曰咸寧之舞其餘闕而不著唐之自製樂凡三大舞一曰七德舞二曰九功舞三曰上元舞七德舞者本名秦王破陣樂太宗為秦王破劉武周軍中相與作秦王破陣樂曲及即位宴會必

奏之謂侍臣曰雖發揚蹈厲異乎文容然功業由之被  
於樂章示不忘本也右僕射封德彝曰陛下以聖武戡  
難陳樂象德文容豈足道哉帝矍然曰朕雖以武功興  
終以文德綏海內謂文容不如蹈厲斯過矣乃製舞圖  
左圓右方先偏後伍交錯屈伸以象魚麗鵠鶴命呂才  
以圖教樂工百二十八人被銀甲執戟而舞凡三變每  
變為四陣象擊刺往來歌者和曰秦王破陣樂後令魏  
徵與員外散騎常侍褚亮員外散騎常侍虞世南太子

右庶子李百藥更製歌辭名曰七德舞舞初成觀者皆扼腕踊躍諸將上壽羣臣稱萬歲蠻夷在庭者請相率以舞太常卿蕭瑀曰樂所以美盛德形容而有所未盡陛下破劉武周薛舉竇建德王世充願圖其狀以識帝曰方四海未定攻伐以平禍亂製樂陳其梗槩而已若備寫擒獲今將相有嘗為其臣者觀之有所不忍我不為也自是元日冬至朝會慶賀與九功舞同奏舞人更以進賢冠虎文袴滕蛇帶烏皮鞞二人執旌居前其後

更號神功破陣樂九功舞本名功成慶善樂太宗生於  
慶善宮貞觀六年幸之宴從臣賞賜問里同漢沛宛帝  
歡甚賦詩起居郎呂才被之管絃名曰功成慶善樂以  
童兒六十四人冠進德冠紫袴褶長襖漆髻屣履而舞  
號九功舞進蹈安徐以象文德麟德二年詔郊廟享祀  
奏文舞用功成慶善樂曳履執紼服袴褶童子冠如故  
武舞用神功破陣樂衣甲持戟執纛者被金甲八佾加  
簫笛歌鼓列坐縣南若舞即與宮縣合奏其宴樂二舞

仍別設焉上元舞者高宗所作也舞者百八十人衣畫雲五色衣以象元氣其樂有上元二儀三才四時五行六律七政八風九宮十洲得一慶雲之曲大祠享皆用之至上元三年詔惟圜丘方澤太廟乃用餘皆罷又曰神功破陣樂不入雅樂功成慶善樂不可降神亦皆罷而郊廟用治康凱安如故儀鳳二年太常卿韋萬石奏請作上元舞兼奏破陣慶善二舞而破陣樂五十二編著於雅樂者二編慶善樂五十編著於雅樂者一編上

元舞二十九編皆著於雅樂又曰雲門大咸大磬大夏  
古文舞也大濩大武古武舞也為國家者揖讓得天下  
則先奏文舞征伐得天下則先奏武舞神功破陣樂有  
武事之象功成慶善樂有文事之象用二舞請先奏神  
功破陣樂初朝會常奏破陣舞高宗即位不忍觀之乃  
不設後幸九成宮置酒韋萬石曰破陣樂舞所以宣揚  
祖宗盛烈以示後世自陛下即位寢而不作者久矣禮  
天子親總干戚以舞先祖之樂今破陣樂久廢羣下無

所稱述非所以發孝思也帝復令奏之舞畢歎曰不見  
此樂垂三十年追思王業勤勞若此朕安可忘武功邪  
羣臣皆稱萬歲然遇饗燕奏二樂天子必避位坐者皆  
興太常博士裴守真以為奏二舞時天子不宜起立詔  
從之及高宗崩改治康舞曰化康以避諱武后毀唐太  
廟七德九功之舞皆亡唯其名存自後復用隋文舞武  
舞而已

開元元年瀛州司法參軍趙慎言言按周禮以樂舞

教國子舞雲門大咸大濩大武是知古之舞者即諸  
侯子孫容服鮮麗故得神祇降福靈光燭壇今之舞  
人並容貌散陋屠沽之流用以接神欲求降福固亦難  
矣隋猶以品子為之號為二舞郎逮乎聖朝遂變斯制  
誠願革茲近誤考復古道其二舞人取品子年二十以  
下顏容修正者為之令太常博士主之准國子學給科  
行事之外習六樂之道學五禮之儀十周年量文武授  
散官號曰雲門生又五郊工人舞人衣服合依五色按

周禮以蒼璧禮天以黃琮禮地以青珪禮東方以赤璋禮南方以白琥禮西方以元璜禮北方是知五方帝德色玉不同四時文物各隨方變冀以同色相感同事相宜陰陽交泰莫不由此今祭器裊褊總隨於五方五郊衣服獨乖於方色舞者常持皂飾工人恆服絳衣以臣愚知深為不便其工人衣服各依方色其宗廟黃色仍各以所主色標袖又以樂治身心禮移風俗請立樂教以化兆民周禮曰以樂德教國子中和祗庸孝

友其國子諸生請教以樂經同於禮傳則人人知禮  
家家知樂自然風移俗易災害不生其樂經章目雖  
詳稍乖旨要請委通明博識修撰訖然後頒下

大定舞 本出破陣樂舞者百四十人被五采文甲持  
樂歌云八弦同軌樂以象平遼東而邊隅大定也

聖壽舞 唐高宗武后作舞用百四十人金銅冠五色  
畫衣舞之行列必成字凡十六變而畢有聖超千古道  
泰百王皇帝萬年寶祚彌昌之字然先王作樂有六變

而止者有八變而止者有九變而止者未聞十六變也  
不亦失大樂必易之意邪

光聖舞 唐明皇作舞者八十人鳥冠五采畫衣兼以  
上元聖壽之容以歌王業所興也

讌樂舞 唐張文收所造也舞工二十人緋綾為袍絲  
布為袴又分四部景雲舞八人慶善舞四人承天舞四  
人樂用玉磬二格大方饗一格搗箏筑臥箏篴大箏篴  
小箏篴大琵琶小琵琶大五絃琵琶小五絃琵琶吹葉

大笙小笙大箴葉小箴葉大簫小簫正銅鈸和銅鈸長  
笛短笛楷鼓連鼓鞀鼓桴鼓各一工歌二開元以後並  
亡唯景雲舞僅存爾

長壽舞 武后長壽年所制舞者十有二人衣冠皆畫  
天授舞 武后天授年所制舞者四人畫衣五采鳳冠  
萬歲舞 鳥歌萬歲樂舞唐武太后所造也當是時宮  
中養鳥能人言又常稱萬歲故為樂以象之舞者三人  
緋大袖並畫鸚鵡冠作鳥像嶺南有鳥似鸚鵡稍大乍

視不可辨久養之能言南人謂之吉了

亦云料

開元初廣

州獻之言音雄重如丈夫委曲識人情慧於鸚鵡遠矣  
漢書武帝紀書南越獻能言鳥豈謂此邪北方常言鸛  
鵒踰嶺乃能言傳者誤矣

龍池舞 唐明皇所作初帝在藩邸居龍慶坊坊之南  
忽變為池望氣者異焉中宗末年汎舟池中及即位以  
坊為宮池水逾大彌漫數里故為此樂以歌其祥舞者  
十有二人為列服五色紗雲衣芙蓉冠無憂履四工執

蓮花以引舞一奏而五疊

小破陣樂舞 唐明皇造舞者四人金甲胄蓋生於立部伎也

師子舞 唐太平樂亦謂之五方師子舞師子摯獸出於西南夷天竺師子等國綴毛為之各高丈餘人居其中像其俛仰馴狎之容二人持繩束拂為習弄之狀五師子各放其方色百四十人歌太平樂舞以足持繩者服飾作毘崙狀

中和舞 唐德宗造舞因成八卦仲春麟德殿會百僚  
觀新樂詩且叙其舞曰朕以仲春之首紀為令節聽政  
之暇韻於歌詩象中和之容作中和之舞

六合還淳舞 唐調露二年上御洛城南樓賜太常奏  
六合還淳之舞

順聖舞 昔于司空頓撰順聖樂以進每宴必使奏之  
其曲將半行綴皆伏一人舞於中央幕客韋授筴曰何  
用窮兵獨舞觀其言雖詼諧然亦不為無味矣豈古所

謂謫諫邪

承天舞 承天樂舞四人紫袍進德冠並銅帶

聖主回鑾舞 唐大定元年天后幸京師同州刺史蘇  
環進聖主還京樂舞上御行宮樓觀之賜以束帛令編  
之樂府

一戎大定舞 唐龍朔元年上召李勣阿史那上官儀  
等宴於城門觀屯營新教之舞名之一戎大定樂皆親  
征遼東形容用武之象也

神宮大樂舞 唐武后長壽中親享萬象神宮因制此舞用舞者九百人作之神宮之庭焉

霓裳舞 唐文宗每聽樂鄙鄭衛聲詔奉常習開元中霓裳羽衣舞以雲韶樂和之舞曲成太常卿馮定總樂工閱之於庭端凝若植文宗乃召升階自吟定送客西江詩因錫禁中瑞錦令錄所著古體詩以獻豈莊周所謂旦暮遇之者邪自兵亂以來霓裳羽衣曲其音遂絕江南僞主李煜樂工曹者素善琵琶因按譜得其聲煜

后周氏亦善音律又自變易徐鉉問曹曰法曲本緩而此聲太急何也曹曰宮中人易之議者以為非吉祥也後歲餘而周氏卒矣

景雲舞 舞者八人花錦為袍五綾為袴綠雲冠黑皮鞞

坐部舞 立部舞 唐安樂太平破陣慶善大定上元聖壽光聖等舞皆雷大鼓雜以龜茲之樂大定樂加金鉦唯慶善舞獨用西涼樂舊破陣上元慶善三舞皆更

其衣冠合之鍾石別享郊廟以破陣為七德之武舞慶  
善為九功之文舞自武后僭亂毀唐宗廟斯禮竟廢矣  
安樂等八舞皆立奏之樂府謂之立部伎也自長壽天  
授鳥歌萬歲龍池小破陣等舞皆同龜茲樂舞人皆穿  
皮鞞惟龍池舞備用雅樂而無鍾石舞躡履讌樂等六  
舞皆坐奏之樂府謂之坐部伎也唐之雅樂其雜夷蠻  
之制如此然則卒致胡雛之禍者有以也夫

傾盃舞 唐明皇常令教舞馬百駟分為左右部時塞

外亦以善馬來貢上俾之教習無不曲盡其妙因命衣以文繡絡金鈴飾其鬣間雜以珠玉其曲謂之傾盃樂凡數十疊奮首鼓尾縱橫應節又施三層板牀乘馬而上抃轉如飛或命壯士舉榻馬舞其上樂工數十環立皆衣以淡黃衫文玉帶必求妙齡姿美者充之每遇千秋節大宴勤政樓奏立坐二部伎畢則自內廐引出舞之其後明皇幸蜀而舞馬散在民間祿山頗心愛之自是以數十匹置之范陽後為田承嗣所得而雜於戰馬

置之外棧既而軍中饗士樂作馬舞不能自止廝養輩  
謂其為妖擁篲以擊之馬立其舞不中節抑揚頓挫尚  
存故態廐吏遽以為怪白承嗣箠之終斃於櫪下惜哉  
由是觀之山海經述海外太樂之野夏后啓於此舞九  
代馬穆天子傳有馬舞之舞亦信有之矣

軟舞 唐開成末有樂人崇胡子能軟舞其腰支不異  
女郎也然舞容有大垂手有小垂手或像驚鴻或如飛  
燕婆娑舞態也蔓延舞綴也然則軟舞蓋出體之自然

非此類歟

健舞 唐教坊樂垂手羅迴陂樂蘭陵王春鶯轉半社  
渠借席烏夜啼之屬謂之軟阿遼柘枝黃章拂林大渭  
州達摩支之屬謂之健舞故健舞曲有大杆阿連柘枝  
劍氣胡旋胡勝軟舞有舞州蘇合香拙枝團亂旋甘州  
焉

歎舞 唐咸通中伶人李可及善音律尤能轉喉為新  
聲音辭曲折聽者忘倦京師屠沽少年效之謂之拍彈

時同昌公主喪除懿宗與郭淑妃悼念不已可及為歎  
百年舞曲舞人皆盛飾珠翠仍畫魚龍地衣以列之曲  
終樂闋珠翠覆地調語悽惻聞者流涕懿宗嘗厚賜之  
時宰相曹確屢論之不納至僖宗朝卒為崔彥昭所奏  
死於嶺表豈得放鄭遠佞之意邪

杜氏通典前代樂飲酒酣必起自舞詩云屢舞僊  
僊是也宴樂必舞但不宜屢耳前代譏在屢舞不  
譏舞也漢武帝樂飲長沙定王舞是也魏晉以來

尤重以舞相屬謝安以屬桓嗣是也近代以來此風絕矣宋孝武帝大明中以鞞拂雜舞合之鍾石施於廟庭鶴舞馬舞竹書穆天子傳亦有之宋鮑昭又有舞鶴賦此舞或時而有非樂府所統今翔麟鳳苑廐有蹀馬俯仰騰躍皆合曲節朝會用樂則兼奏之

梁太祖開平初造崇德之舞以祀昊天開平之舞以享宗廟然廟有四室室為一舞一室曰大合之舞二室曰

象功之舞三室曰來儀之舞四室曰昭德之舞

後唐依前制獨宗廟四室別立舞名懿宗用昭德之舞  
獻祖用文明之舞太祖用應天之舞昭宗用永平之舞  
莊宗用武成之舞明宗用雍熙之舞

晉高祖初詔崔暹等制定樂舞暹等講求唐制盡復其  
器服工員改文曰昭德之舞武曰成功之舞始為大會  
陳之並推取教坊諸工以備行列屈信俯仰頗有儀度  
其後太常更自廣募工員多出市人閱習未幾而元會

朝饗遂用寺工以陳於廷進退無旅而歌如虞殯當時識者觀之知晉之將亡兆於此矣

漢高祖即位之初太常張昭進言唐有治康凱安七德九功四舞不可廢罷宜更名號示不相襲也故治康曰治安之舞凱安曰振德之舞九功曰觀象之舞七德曰講功之舞治安振德用之郊廟觀象講功施之燕享又宗廟四室室別名舞一室曰靈長之舞二室曰積善之舞三室曰顯仁之舞四室曰章慶之舞宋高祖廟有

司上觀德之舞云

周廣順初太常卿邊蔚奏改治安為政和之舞振德為  
善勝之舞觀象為崇德之舞講功為象成之舞宗廟樂  
舞信祖廟舞肅雍之舞僖祖廟舞章德之舞義祖廟舞  
善慶之舞慶祖廟舞觀成之舞太祖廟舞明德之舞世  
宗廟舞定功之舞

宋朝建隆之初竇儼首議更周樂舞之名以崇德舞為  
文德之舞象成舞為武功之舞權籍教坊及開封府樂

戶子弟充之冠服用唐舊制而已

太祖皇帝乾元殿朝羣臣更詣大明殿上壽詔用文德武功之舞然郊廟殿廷同制其容綴未稱朝廷揖遜之意故和峴建言宜先奏文舞焉殿廷所用文舞宜為盛德升聞之舞取舜受堯禪元德升聞之義也舞工用百二十人八佾之數判為八列列十六工皆著履執拂服袴褶冠進賢二工執五采纛引之文容變數略倣舊儀次奏武舞宜為天下大定之舞取武王一戎衣而天下

大定之義也舞工亦準文舞之數被金甲持戟二工執五色旗引之一變象六師舉二變象上黨平三變象維揚定四變象荆湖復五變象叩蜀來六變象師還振旅至於鐃鐸雅相鎗鼗并舞舞工冠服仍舊而已太宗淳化中峴弟蒙復奏昔改殿廷二舞以光太祖功烈今亦應更定舞名其舊用盛德升聞宜更名化成天下之舞取易稱化成天下之義也天下大定更名威加海內之舞取漢高祖為威加海內之歌也蓋其舞亦六變焉一

變象講武二變象漳泉歸三變象杭越朝四變象殄并  
汾五變象清銀夏六變象兵還振旅每變樂一曲而已  
詔從之和峴弟兄可謂善因時而造者

真宗又詔殿廷二舞復用乾德舊名祥符中崇奉玉清  
昭應宮等諸祠每乘輿薦獻並作備樂別號文舞曰發  
祥流慶之舞武舞曰降真觀德之舞又因太宗裁萬國  
朝天之曲造同和之舞裁平晉之曲造定功之舞郊廟  
並奏之天聖中孫奭進言太常雅樂郊廟酌獻上用登

歌不作文舞亞獻又不作武舞止奏正安而已於是劉  
筠等議自是宗廟酌獻復用文舞武舞工先入以須亞  
獻而亞獻終獻並舞正安之曲郊祀天地與宗廟既異  
廟室各有稱頌功德故文舞迎神之後各奏逐室之舞  
郊祀降神奏高安之曲文舞已作及皇帝酌泛齊惟登  
歌奏禧安之樂而舞綴不作亞獻終獻仍用武舞焉明  
道中冬至皇帝率羣臣於文德殿莊獻明肅皇太后行  
上壽之禮設宮縣進厚德無疆之文舞四海會同之武

舞各三變而罷

宋祖宗廟室樂舞之名 僖祖室曰大善之舞順祖室  
曰大寧之舞翼祖室曰大順之舞宣祖室曰大慶之舞  
太祖室曰大定之舞太宗室曰天盛之舞真宗室曰大  
明之舞仁宗室曰大仁之舞英宗室曰大英之舞神宗  
室曰大成之舞諸后之室凡行酌獻之禮孝惠孝章位  
同奏大統之曲淑德位奏大昌之曲章懷位奏大治之  
曲自餘隨帝室所奏云

陳氏樂書曰竊觀祖宗之室曲異之舞至於后室  
一用文德之舞而武舞不用焉豈非感於先儒婦  
人無武事之說邪春秋書初獻六羽非無武舞也  
特舉羽以見干耳如曰不然閼宮祀姜嫄之詩何  
以美萬舞洋洋乎古人亦常振萬於文夫人之側  
亦足考信矣方今誠於諸后之室并奏文武之舞  
以娛樂神靈以形容德美真曠代甚盛之舉而不  
失先王之制也

又曰周人教國子之舞有大司樂有小司樂又舞師下士二人胥四人舞徒四十人然則古之舞者非獨給繇役之賤者而已雖為國子爵為下士亦預焉漢太樂律卑者之子不得舞宗廟之酎除吏二千石至六百石閭內侯至五大夫之子取其適者五尺以上年十二至三十顏色和身體修治者以為舞人古國子下士之實也唐之郊廟舞工不合古制趙慎言奏議隋代猶以品子為之號二舞

郎唐興遂變其制誠願復古道取品子年二十以下容質修正者備二舞之員令太常博士主之准國子學給科閒日得習六樂學五禮滿十歲量文武授散官號雲門生其制亦可謂近古矣然不設課試之法勸沮之術未為備制也聖朝舞郎之制尚仍唐舊誠推慎言之法輔之以課試勸沮之方以之饗郊廟接神祇未有不降格而來饗矣今日不得不為之留意也

神宗元豐二年詳定所以朝會樂而有請者十其三定  
文舞武舞各為四表表距四步為鄴綴各六十四文舞  
者服進賢冠左執籥右秉翟分八佾二工執纛引前衣  
冠同之舞者進蹈安徐進一步則兩兩相顧揖三步三  
揖四步為三辭之容是為一成餘成如之自南第一表  
至第二表為第一成至第三表為再成至北第一表為  
三成覆卻行至第三表為四成至第二表為五成復至  
南第一表為六成而武舞入今文舞所秉翟羽則集雉

尾置於髹漆之柄求之古制實無所本聶崇義圖羽舞所執類羽葆幢析羽四重以結綬系於柄此纛翳之謂也請按圖以翟羽為之其四武舞服平巾幘左執干右執戈二工執旌居前執鼗執鐸各二工金鐸二四工舉二工執鐺執鐃執相在左執雅在右亦各二夾引舞者衣冠同之分八佾於南表前先振鐸以通鼓乃擊鼓以警戒舞工聞鼓聲則各依鄼綴總干正立安位堂上長歌以咏歎之於是播鼗以導舞舞者進步自南而北至

最南表以見舞漸然後左右夾振鐸次擊鼓以金鐸和之以金鐻節之以相而輔樂以雅而陔步舞者發揚蹈厲為猛賁遶速之狀每步一進則兩兩以戈盾相嚮一擊一刺為一伐為一成成謂之變至第二表為一變至第三表為二變至北第一表為三變舞者覆身嚮堂卻行而南至第三表為四變乃擊刺而前至第二表回易行列舂雅節步分左右而跪以右膝至地左足仰起象以文止武為五變舞蹈而進為兵還振旅之狀振鐸搖

鼗擊鼓和以金鐻廢鐻鳴銑復至南第一表為六變而舞畢古者人君自舞大武故服冕執干戚若用八佾而為擊刺之容則舞者執干戈說者謂武舞戰象樂六奏每一奏之中率以戈矛四擊刺戈則擊兵矛則刺兵王戚非可施於擊刺今舞執干戚蓋沿襲之誤請左執干右執戈

哲宗元祐四年十二月始命大樂正葉防撰三朝二舞儀武舞曰威加四海之舞第一變舞人去南表三步總

干而立聽舉樂三鼓前行三步及表而蹲再鼓皆舞進  
一步正立再鼓皆持干荷戈相顧作猛賁遽速之狀再  
鼓皆轉身向裏以干戈相擊刺足不動再鼓皆回身向  
外擊刺如前再鼓皆正立舉手蹲再鼓皆舞進一步轉  
面相向立干戈各直腰再鼓各前進以左足在前右足  
在後左手執干當前右手持戈在腰為進旅再鼓各相  
擊刺再鼓各退身復位整其干為退旅再鼓皆正立蹲  
再鼓皆舞進一步正立再鼓皆轉面相向秉干持戈坐

作再鼓各相擊刺再鼓皆起收其干戈為克捷之象再鼓正立遇節則蹲第二變聽舉樂依前蹲再鼓皆舞進一步正立再鼓皆正面作再鼓各轉身向裏相擊刺足不動再鼓各轉身向外擊刺如前再鼓皆正立蹲再鼓皆舞進一步陳其干戈左右相顧為賁速之狀再鼓皆併入行以八為四再鼓皆兩兩對相擊刺再鼓皆回易行列左在右右在左再鼓皆舉手蹲再鼓皆舞進一步正立再鼓各分左右再鼓各揚其干戈再鼓交相擊刺

再鼓皆總干正立遇節樂則蹲第三變聽舉樂則蹲再鼓皆舞進一步轉面相向再鼓整干戈以象登臺講武再鼓皆擊刺於東南再鼓皆案盾舉戈東南嚮而望以象漳泉奉土再鼓皆擊刺於正南再鼓皆按盾舉戈南嚮而望以象杭越來朝再鼓皆舞一步正立再鼓皆擊刺於西北再鼓皆案盾舉戈西北嚮而望以象克殄并汾再鼓皆擊刺於正西再鼓皆按盾舉戈西嚮而望以象肅清銀夏再鼓皆舞進一步正跪右膝至地左足微

起再鼓皆置干戈於地西各拱其手象其不用再鼓皆左右舞蹈象以文止武之意再鼓皆就拜收其干戈起而躬立再鼓皆舞退鼓盡即止以象兵還振旅文舞曰化成天下之舞第一變舞人立南表之南聽舉樂則蹲再鼓皆舞進一步正立再鼓皆稍前而正揖合手自下而上再鼓皆左顧左揖再鼓皆右顧右揖再鼓皆開手蹲再鼓皆進一步正立再鼓皆少卻身初辭合手自上而下再鼓皆右顧以右手在前左手推出為再辭再鼓

皆左顧以左手在前右手推出為固辭再鼓皆合手蹲  
再鼓皆舞進一步正立再鼓皆俛身相顧初謙合手當  
胷再鼓皆右側身左垂手為再謙再鼓皆左側身右垂  
手為三謙再鼓皆躬而授之遇節樂則蹲第二變聽舉  
樂則蹲再鼓皆舞進一步轉面相向再鼓皆稍前相揖  
再鼓皆左顧左揖再鼓皆右顧右揖再鼓皆開手蹲正  
立再鼓皆舞進一步復相向再鼓皆卻身為初辭再鼓  
皆舞辭如上儀再鼓皆再辭再鼓皆固辭再鼓皆合手

蹲正立再鼓皆舞進一步再鼓相向再鼓皆顧為初謙  
再鼓皆再謙再鼓皆三謙再鼓皆躬而授之正立節樂  
則蹲第三變聽舉樂則蹲再鼓皆舞進一步兩兩相向  
再鼓皆相趨揖再鼓皆左揖如上再鼓皆右揖再鼓皆  
開手蹲正立再鼓皆舞進一步復相向再鼓皆卻身初  
辭再鼓皆再辭再鼓皆固辭再鼓皆合手蹲正立再鼓  
皆舞進一步兩兩相向再鼓皆相顧初謙再鼓皆再謙再  
鼓皆三謙躬而受之正立節樂則蹲凡二舞綴表器及

引舞振作並與大祭祀之舞同協律郎陳沂按閱以謂  
節奏詳備自是朝會則用之

徽宗政和二年議禮局上親祠二舞之制

詳見樂懸門

高宗紹興十三年詔討論郊廟樂舞僖祖廟用基命之  
樂舞翼祖廟用大順之樂舞宣祖廟用天元之樂舞太  
祖廟用皇武之樂舞太宗廟用大定之樂舞真宗仁宗  
廟樂舞曰熙文曰美成英宗神宗廟樂舞曰治隆曰大  
明哲宗徽宗欽宗廟樂舞曰重光曰承元曰瑞慶皆以

無射宮奏之

詳見樂制門

寧宗即位孝宗廟奏用大倫之樂舞光宗廟奏用大和之樂舞

文獻通考卷一百四十五